

VRSTA OSIGURANJA 01 VRSTA RIZIKA 01.03

U skladu s odredbama člana 10. Zakona o osiguranju (Službene novine Federacije BiH, broj 23/17, 103/21), Odluke o dodatnoj dokumentaciji, vrsti i sadržaju akata poslovne politike koja se dostavljaju uz zahtjev za izdavanje odobrenja za rad (Službene novine Federacije BiH, broj 84/17, 15/19), na osnovu člana 75. Statuta Triglav Osiguranja d.d., broj: OPU-IP: 443/17 od 05.06.2017. godine, OPU-IP: 492/18 od 07.06.2018. godine i OPU-IP: 467/22 od 20.05.2022. godine, a po dobijenoj saglasnosti Rješenjem Agencije za nadzor osiguranja Federacije BiH, broj:02-07.4-04-2870-2/23 od 20.09.2023.godine, Uprava Društva dana 27.09.2023.godine donosi:

Dodatni uvjeti za osiguranje djece od posljedica nesretnog slučaja i smrt uslijed bolesti do okončanog osnovnog školovanja

PG-nuc-OTR
23-07-bh

Član 1. OPĆE ODREDBE

- (1) Opći uvjeti za osiguranje osoba od posljedica nesretnog slučaja (u daljnjem tekstu: Opći uvjeti) i ovi Dodatni uvjeti, sastavni su dio ugovora o osiguranju djece od posljedica nesretnog slučaja do okončanog osnovnog školovanja.
- (2) Ugovarač osiguranja po ovim Dodatnim uvjetima može biti: roditelj ili staratelj, svaka druga pravna ili fizička osoba koja ima interes za ugovaranje ovog osiguranja.

Član 2. OSIGURANE OSOBE

Osobe navedene u članu 1. stav (1) ovih, Dodatnih uvjeta, osiguravaju se do navršene 14.godine starosti, odnosno do okončanog osnovnog školovanja, bez obzira na starost, zdravstveno stanje i opću radnu sposobnost, kao i bez plaćanja povišene premije u smislu člana 9. stav (1) tačka 6. Općih uvjeta, osim osoba koje su u smislu člana 5. stav(3) Općih uvjeta u svakom slučaju isključene iz osiguranja.

Član 3. OSIGURANE OPASNOSTI

- (1) Osiguravač je dužan isplatiti u polici ugovorenu osiguranu sumu u cijelosti ili djelimično, ukoliko je uslijed nezgode ili bolesti nastupila smrt osiguranika, ako nezgoda ima za posljedicu invaliditet, lom kosti, prolaznu nesposobnost za rad ili narušenje zdravlja koje zahtijeva liječničku pomoć, a nastane:
 - 1) u svakodnevnom životu osiguranog djeteta: kod kuće i izvan kuće, u školi, na ulici, igralištu, izletu, ekskurziji itd.;
 - 2) pri vožnji bilo kojim prevoznim sredstvom;
 - 3) učestvovanjem u svim sportovima.

Član 4. TRAJANJE OSIGURANJA

- (1) Ugovor o osiguranju se sklapa:
 - 1) na određeno vrijeme - kao jednogodišnji ili višegodišnji;
 - 2) na neodređeno vrijeme - dugoročno osiguranje.Na polici je označen dan početka osiguranja.
- (2) Ako je u polici naveden samo početak osiguranja, osiguranje prestaje krajem one godine osiguranja u kojoj je osiguranik navršio 14 godina života, odnosno po isteku posljednje godine osiguranja djece, odnosno po isteku osnovnog školovanja.
- (3) Obaveza Osiguravača kod kolektivnog načina osiguranja, ako je ugovarač osiguranja predškolska ustanova ili osnovna škola, počinje za svako dijete, odnosno učenika u 24.00 sata onog dana kad se prijavio u osiguranje i bio upisan u popis osiguranika od ugovarača osiguranja, ali ne prije od 24.00 sata onog dana, koji je službeno određen za početak nove osiguravajuće, odnosno školske godine.
- (4) Obaveza Osiguravača za pojedinog osiguranika prestaje u 24.00 sata dana prestanka osiguranja, odnosno na kraju posljednje godine osiguranja djece, odnosno na kraju osnovnog školovanja.
- (5) Obaveza po kolektivnom osiguranju, ako je ugovarač osiguranja predškolska ustanova, škola ili druga ustanova iz protekle osiguravajuće, odnosno školske godine, prestaje za pojedinog osiguranika u 24.00 sata onog dana kada je platio premiju osiguranja za tekuću osiguravajuću, odnosno školsku godinu. Ako osiguranik iz protekle osiguravajuće, odnosno školske godine ne plati premiju osiguranja za tekuću osiguravajuću, odnosno školsku godinu, prestaje

obaveza Osiguravača najkasnije u 24.00 sata tridesetoga dana od službenog početka osiguravajuće, odnosno školske godine na dotičnoj predškolskoj ustanovi, odnosno školi. Odredbe ovog stava vrijede i u slučaju ako je osiguranik iz protekle osiguravajuće godine prešao u drugu predškolsku ustanovu ili ako je osiguranik iz protekle školske godine prešao u drugu osnovnu školu.

Član 5. OGRANIČENJE OBIMA OBAVEZE OSIGURAVAČA

- (1) Ako je u cjenovniku premije Osiguravača određena najveća osigurana suma do koje jedno dijete može biti osigurano, Osiguravač garantuje najviše do te sume, bez obzira na to je li dijete osigurano jednom ili više policia. Ovo ograničenje vrijedi samo ako je navedeno na polici.
- (2) Ako zbog posljedica nezgode umre osiguranik mlađi od 14 godina, Osiguravač plaća za troškove sahrane osiguranu sumu za slučaj smrti navedenu na polici.
- (3) Ako je smrt osiguranika nastupila uslijed bolesti u prvih šest mjeseci od pristupa u osiguranje, Osiguravač će isplatiti 50% ugovorene osigurane sume za smrt uslijed bolesti. U slučaju smrti uslijed bolesti nakon 6 mjeseci od pristupa u osiguranje, Osiguravač isplaćuje ugovorenu osiguranu sumu.

Član 6. ISKLJUČENJE OBAVEZE OSIGURAVAČA

- (1) Isključene su sve obaveze Osiguravača za nezgode koje nastanu:
 - 1) zbog potresa;
 - 2) zbog ratnih operacija ili pobuna u državi ugovarača osiguranja.

Član 7. PLAĆANJE PREMIJE

- (1) Ugovarač osiguranja plaća Osiguravaču premiju u cijelosti za osiguravajuću godinu, ukoliko nije drugačije ugovoreno.
- (2) Ugovarač osiguranja je kod kolektivnog osiguranja dužan voditi evidenciju o plaćenju premiji, s tačnim datumom uplate za pojedinog osiguranika i doznačiti premiju Osiguravaču zajedno s popisom osiguranika, ako nije ugovoreno drugačije.

Član 8. ISPLATA DNEVNE NAKNADE

- (1) Ako je ugovoreno osiguranje dnevne naknade, ista pripada osiguranicima koji još ne idu u osnovnu školu, za vrijeme imobilizacije udova gipsom, šinama i sl., za vrijeme u kojem nisu mogli dolaziti u predškolsku ustanovu, ili je bilo potrebno čuvanje kod kuće.
- (2) Ako nezgoda ima za posljedicu osiguranikovu prolaznu nesposobnost za rad u školi, a ugovorom o osiguranju je ugovorena isplata dnevne naknade, Osiguravač plaća osiguraniku koji ide u osnovnu školu tu naknadu u ugovorenoj visini, od dana određenog u polici (ugovorena karencija). Ako taj dan nije određen, onda od prvog dana koji slijedi danu početka liječenja kod ljekara ili u zdravstvenoj ustanovi, do zadnjeg dana trajanja prolazne nesposobnosti za rad u školi, odnosno do smrti ili do utvrđenog invaliditeta. Dnevna naknada za vrijeme prolazne nesposobnosti za rad u školi, ne isplaćuje se nakon utvrđivanja konačnog postotka invaliditeta.

Dnevna naknada se isplaćuje za najviše 200 dana prolazne nesposobnosti za rad u školi.
- (3) Smatra se da je osiguranik nesposoban za rad u školi ako zbog nezgode ne može dolaziti na nastavu, pisati, crtati i obavljati druge zadatke. Nepokretljivost pojedinih udova zbog imobilizacije gipsom,

smatra se nesposobnošću za rad u školi, iako je osiguranik pohađao nastavu. Privremena nesposobnost obavljanja tjelesnog odgoja u okviru školske nastave ne smatra se nesposobnošću za rad u školi, zato osiguraniku ne pripada dnevna naknada. Kod prolazne nesposobnosti za vrijeme školskih praznika za isplatu dnevne naknade mjerodavna je ocjena ljekara o tome da li bi osiguranik bio sposoban za redovni rad u školi koji je obavljao prije školskih praznika.

- (4) Dnevna naknada se isplaćuje po završenom liječenju na osnovu ljekarske potvrde. Može se isplatiti samo na osnovu službene potvrde škole, u kojoj mora biti navedeno koliko vremena osiguranik nije dolazio na nastavu, ali samo onda ako je nesposobnost za rad u školi trajala najviše 30 dana.

Ako je prolazna nesposobnost za rad u školi produžena zbog nekih drugih zdravstvenih razloga, Osiguravač je dužan isplatiti dnevnu naknadu samo za trajanje nesposobnosti za rad u školi, koja je isključivo posljedica nezgode.

Član 9. ODREĐIVANJE KORISNIKA OSIGURANJA

- (1) Ukoliko u polici nije drugačije ugovoreno, korisnikom osiguranja smatra se:
- 1) u slučaju smrti - roditelji odnosno staratelji;
 - 2) u slučaju invaliditeta - sam osiguranik;
 - 3) u slučaju dnevne naknade - sam osiguranik;
 - 4) u slučaju loma kosti - sam osiguranik;
 - 5) u slučaju prolaznog narušenja zdravlja - osoba koja dokaže da je platila troškove liječenja, odnosno da ih mora platiti.

Član 10. ZAVRŠNE ODREDBE

Ovi Dodatni uvjeti vrijede uz Opće uvjete. Ukoliko se njihov sadržaj razlikuje od Općih uvjeta, vrijede ovi Dodatni uvjeti.

Dodatni uvjeti za osiguranje djece od posljedica nesretnog slučaja i smrti usljed bolesti do okončanog osnovnog školovanja s oznakom PG-nuc-OTR/23-07-bh stupaju na snagu i primjenjuju se danom donošenja, čime prestaju važiti Dopunski uvjeti za osiguranje djece od posljedica nesretnog slučaja i smrti usljed bolesti do okončanog osnovnog školovanja s oznakom PG-nuc-OTR/07-08-bh.

Do isteka osiguranja polica koje su zaključene prije stupanja na snagu ovih Uvjeta osiguranja, važeći su Dopunski uvjeti za osiguranje djece od posljedica nesretnog slučaja i smrti usljed bolesti do okončanog osnovnog školovanja s oznakom PG-nuc-OTR/07-08-bh.

Datum: 27.09.2023.

Broj: 01/10080123